

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 445605 23 St
Tuzla, 12.04.2024. godine

Općinski sud u Tuzli, stečajni sudija Vedran Milašinović, u stečajnom postupku nad stečajnim dužnikom „STUP COMPANY“ d.o.o. za trgovinu, promet i usluge Gradačac, Mionica bb, sa podružnicom „STUP COMPANY“ d.o.o. Gradačac, podružnica 1 Ilidža, Stupsko brdo bb, nakon provedenog stečajnog postupka, donio je dana 12.04.2024. godine sljedeće:

RJEŠENJE

OTVARA SE stečajni postupak nad imovinom dužnika „STUP COMPANY“ d.o.o. za trgovinu, promet i usluge Gradačac, Mionica bb, sa podružnicom „STUP COMPANY“ d.o.o. Gradačac, podružnica 1 Ilidža, Stupsko brdo bb, matični broj subjekta 1-13685, JIB: 4209759110006, račun broj: 1321900311829161 otvoren kod NLB banka d.d. Sarajevo.

Za stečajnog upravnika imenuje se Emir Nuhanović iz Živinica, Priluk 65.

ZAKLJUČUJE SE stečajni postupak nad imovinom dužnika „STUP COMPANY“ d.o.o. za trgovinu, promet i usluge Gradačac, Mionica bb, sa podružnicom „STUP COMPANY“ d.o.o. Gradačac, podružnica 1 Ilidža, Stupsko brdo bb, zbog nedostatka stečajne mase za pokriće troškova stečajnog postupka.

Rješenje će se objaviti na oglasnoj tabli suda, web stranici suda, Službenim novinama F BiH, te dostaviti FIA.

Pravne posljedice zaključenja stečajnog postupka nastupit će po proteku osam dana od dana objavljivanja rješenja u „Službenim novinama F BiH“, a pravosnažno rješenje će se dostaviti Odjelenju registra ovog suda, radi brisanja stečajnog dužnika iz sudskog registra.

Obrazloženje

„STUP COMPANY“ d.o.o. Gradačac je dana 28.04.2023. godine podnio prijedlog za otvaranje likvidacionog postupka nad navedenim društvom koji postupak je otvoren dana 29.05.2023. godine, a nakon što je utvrđeno da društvo ima obaveza, a da nema imovine čijim unovčenjem bi se mogli namiriti povjerioci, to je likvidator predložio da se obustavi likvidacioni postupak, a da se postupak nastavi po pravilima stečajnog postupka. Rješenjem Općinskog suda u Tuzli broj: 32 0 St 445605 23 St od 21.08.2023. godine, obustavljen je likvidacioni postupak i likvidator je razriješen dužnosti likvidatora, a istovremeno pokrenut je prethodni postupak radi utvrđivanja uslova za otvaranje stečajnog postupka nad imovnom društvom „STUP COMPANY“ d.o.o. za trgovinu, promet i usluge Gradačac, Mionica bb, sa podružnicom „STUP COMPANY“ d.o.o. Gradačac, podružnica 1 Ilidža, Stupsko brdo bb, a za privremenog stečajnog upravnika imenovan je Emir Nuhanović iz Živinica, sve temeljem odredaba člana 61 Zakona o stečaju (Sl. novine F BiH 53/21).

Privremeni stečajni upravnik dostavio je izvještaj o provedenom prethodnom postupku ovom sudu dana 05.10.2023. godine. Iz izvještaja privremenog stečajnog upravnika i navoda datih na ročištu proizilazi da je društvo prestalo sa radom 2010. godine kada je u sudskom registru upisan i prestanak društva. Društvo ima dva bankovna računa od kojih je jedan blokiran 2010. godine a drugi 01.10.2018. godine kada je i nastupila platežna nesposobnost društva koja traje i do danas. Društvo ima obaveze prema Poreznoj upravi F BiH po osnovu javnih prihoda, dok prema UIO BH na dan 18.04.2023. godine nije imalo obaveza, dok se iz knjigovodstvene dokumentacije nije moglo utvrditi da li ima obaveza prema trećim licima. Društvo

nema zaposlenih radnika. Društvo nema bilo kakve imovine koja bi se mogla unovčiti, nema nepokretnosti niti pokretne imovine u svom vlasništvu, gotovine, niti sredstava na računima koji su kako je već rečeno duži vremenski period blokirani.

Dakle, privremeni stečajni upravnik nalazi da postoji stečajni razlog za otvaranje stečajnog postupka predviđen članom 6 stav 2 i članom 102 Zakona o stečaju. Privremeni stečajni upravnik navodi da je potpuna platežna nesposobnost stečajnog dužnika nastupila dana 01.10.2018. godine kada mu je blokirani posljednji aktivni račun, u kom trenutku nije bio na snazi važeći zakon o stečaju, a da prema odredbama tada važećeg zakona koji je regulisao stečajni postupak nisu bile predviđene kazne za odgovorno lice u slučaju nepodnošenja prijedloga za otvaranje stečajnog postupka u slučaju nastupanja platežne nesposobnosti stečajnog dužnika, da niko od povjerilaca nije podnio prijedlog za otvaranje stečaja što je bila njihova zakonska mogućnost, slijedom čega je stečajni dužnik na vrijeme podnio prijedlog za otvaranje stečajnog postupka i na njega se ne odnose odredbe člana 58 stav 15 Zakona o stečaju.

Suprotno od izraženog mišljenja stečajnog upravnika, po ocjeni ovog suda prijedlog za otvaranje stečajnog postupka nije podnesen u zakonskom roku od 60 dana od dana nastupanja platežne nesposobnosti, kod činjenice da je platežna nesposobnost nastupila 2018. godine od kada je blokirani posljednji račun društva blokirani, dok je Zakon o stečaju stupio na snagu 15.07.2021. godine, tako da se u konkretnom slučaju ne radi o retroaktivnoj primjeni zakona jer je prijedlog za otvaranje stečajnog postupka podnesen znatno nakon isteka propisanog roka računajući od trenutka primjene zakona. Sud ukazuje da predmet ovog postupka nije utvrđivanje eventualne prekršajne odgovornosti odgovornog lica, s obzirom da je ovlašteni organ za pokretanje prekršajnog postupka u slučaju ne podnošenja prijedloga u roku FIA, a koji se može pokrenuti izdavanjem prekršajnog naloga ili podnošenjem zahtjeva za pokretanje prekršajnog postupka pred nadležnim sudom, u smislu odredaba člana 58 stavovi 16 i 17 Zakona o stečaju.

U smislu odredbe člana 103 stav 1 Zakona o stečaju, a u vezi sa odredbom člana 102 stav 7 Zakona o stečaju F BiH, a budući da dužnik ne raspolaže sredstvima za vođenje stečajnog postupka iz kojih bi se mogli podmiriti troškovi stečajnog postupka, sud je rješenjem od 29.11.2023. godine pozvao predlagača, povjerioci i sva zainteresovana lica da u roku od 30 dana od dana objavljivanja poziva u službenim novinama uplate iznos od 3.500,00 KM na ime otvaranja stečajnog postupka, iz kojeg predujmljenog iznosa bi se pokrili troškovi stečajnog postupka.

Rješenje kojim se pozivaju predlagač, povjerioci i sva zainteresovana lica, objavljeno je u Službenim novinama F BiH broj 96/23 dana 13.12.2023. godine, oglasnoj tabli suda dana 30.11.2023. godine i na web stranici suda, kojim se objavama javni poziv smatra dostavljenim.

S obzirom da u ostavljenom roku koji je propisan zakonom predlagač, povjerioci ili neko od zainteresovanih lica nisu izvršili uplatu predujma za obezbjeđenje troškova stečajnog postupka, sud je u smislu odredbe člana 102 stav 8 Zakona o stečaju, donio odluku o otvaranju i zaključenju stečajnog postupka, na način određen u izreci rješenja.

Temeljem odredbe člana 102 stav 8 Zakona o stečaju, rješenje o zaključenju stečajnog postupka dostavlja se nadležnom tužilaštvu Tuzlanskog kantona, Poreskoj upravi FBIH i Upravi za indirektno oporezivanje BiH.

Nadalje, temeljem odredbe člana 204 stav 1 i 3 Zakona o stečaju, a u vezi sa odredbom člana 190 stav 10 Zakona o stečaju, rješenje se ima objaviti na oglasnoj tabli suda, WEB stranici suda, Službenim novinama F BiH te dostaviti FIA, dok je odredbom člana 204 stav 2 istog zakona propisano da pravne posljedice zaključenja stečajnog postupka proizvode pravno dejstvo u roku od 8 dana od dana objave ovog rješenja u Službenim novinama FBIH.

Odluka o brisanju pravnog lica iz javnih registara temelji se na odredbi člana 204 stav 5 Zakona o stečaju.

Na osnovu odredbe člana 206 stav 2 Zakona o stečaju, osnivač društva je dužan preuzeti arhivsku građu i istu predati nadležnom arhivu na čuvanje.

Temeljem odredbe člana 102 stav 8 Zakona o stečaju sud je odlučio kao u izreci rješenja.

Stečajni sudija
Vedran Milašinović

POUKA O PRAVU NA IZJAVLJIVANJE PRAVNOG LIJEKA:

Protiv ovog rješenja stečajni povjerioci i stečajni dužnik mogu izjaviti žalbu Kantonalnom sudu u Tuzli, putem ovog suda, u roku od 8 dana, od dana objavljivanja rješenja u Službenim novinama.